



**Komunikadu Imprensa**  
**Munisípiu Baukau**  
**23 Feveiru 2024**

**Programa Apoiu Seguransa Komunitáriu (PASK) habelar iha Suku  
Fatulia**

JSMP nia Programa Apoiu Seguransa Komunitáriu (PASK) kontinua habelar iha Suku Fatulia, nune'e iha 16 Feveiru 2024 JSMP ho autóridade Suku Fatulia, Postu Administrativu Venilale, Munisípiu Baukau, asina Nota Entendimentu (MoU).

Asinatura ba Nota Entendimentu ne'e primeiravés estabelese entre parte rua, ne'ebé JSMP representa hosi Diretora Ezekutiva, Sra. Ana Paula Marçal no Suku Fatulia representa hosi Xefe Suku, Sr. Angelino Moises Pereira.

“JSMP agradese tebes ba Suku Fatulia ho nia estrutura tomak ne'ebé hakarak serbisu hamutuk ho JSMP hodi bele realiza programa PASK iha Suku Fatulia. Espera ho serbisu hamutuk ne'e bele tulun comunidade sira asesu ba justisa formál tanba durante ne'e comunidade barak iha área rurais menus informasaun no defisil atu asesu ba informasaun sira ba sira nia kazu”, dehan Sra. Ana Paula Marçal, Diretora Ezekutiva JSMP.

Objetivu hosi asina Nota Entendimentu ne'e atu asegura komunikasaun no koordenasaun ne'ebé di'ak entre parte rua durante implementasaun Programa Apoiu Seguransa komunitáriu (PASK) no mós bele asegura implementasaun atividade sira ne'ebé mak atu hala'o bele implementa ho di'ak no mós bele asegura katak atividade sira ne'ebé mak hala'o ne'e tuir duni objetivu programa ne'e rasik.

Administradór Postu Administrativu Venilale Sr. Jose Freitas Boavida mós agradese ba JSMP tanba antes ne'e JSMP implementa ona programa ne'e iha Suku Uma-Ana-Ulu no iha tinan ida ne'e haluan tan programa ne'e ba suku Uma-Ana-Iku no Fatulia. Administradór ne'e mós husu ba JSMP atu nafatin kontinua serbisu hamutuk ho estrutura suku, OPS no comunidade sira hodi fahe/divulga informasaun sira relasiona ho lei aplikável sira nune'e comunidade iha koñesimentu ba lei no bele lori sira nia kazu ba iha sistema justisa formál.

Iha parte seluk intervensaun hosi Komandante Polísia Eskuarda Venilale, Sr. Sebastião Freitas iha ninia intervensaun husu ba estrutura suku atu kolabora ho JSMP no haktuir tan katak Polísia Eskuarda Venilale mós prontu apoiu no kolabora hamutuk ho JSMP hodi bele implementa programa ne'e iha Suku Fatulia tanba konsidera programa ne'e importante tebes no bele ajuda lideransa suku sira no mós polísia sira hodi akompaña comunidade sira atu asesu sira nia direitu ba justisa formál.

Nune'e mós, Xefi Suku Fatulia, Sr. Angelino Moises Pereira iha nia intervensaun hato'o agradese wain tebes ba JSMP, tanba bele hili ona Suku Fatulia hodi serbisu hamutuk ba implementasaun programa ne'e no estrutura tomak hosi suku ne'e prontu atu kolabora tanba konsidera programa ne'e importante tebes no atu fasilita comunidade sira bele asesu ba informasaun sira relasiona ho justisa formál.

Xefi suku hatutan liután katak iha suku ne'e iha problema barak tebes tanba ne'e prezensa JSMP bele fó hanoin no buka solusaun ba kazu comunidade sira nian no ajuda estrutura suku sira hodi fó solusaun ba problema sira, tanba dala barak estrutura suku sira laiha koñesimentu ba iha justisa formál nian no presija tebes JSMP nia tulun atu bele ajuda buka informasaun kona-ba comunidade sira ne'ebé mak nia kazu nia prosesu to'o ona iha Polísia, Ministériu Públiku, Tribunál no informasaun ne'e bele lori fila ba informa iha estrutura suku sira no comunidade, nune'e comunidade bele hatene andamentu no desizaun husi sira nia kazu.

Iha seremónia asina MoU ne'e partisipa hosi Administradór Postu Administrativu Venilale, Sr. Jose Freitas Boavida, komandante PNTL Eskuarda Venilale, akompaña hosi xefi aldeia ha'at (4), lia-nain, delegada no delegadu sira, joven feto no mane, Makaleha Maksabar sira, Katuas Uma Lisan, OPS, Líder Partidu Pólitiku sira iha suku, Representante grupu arte marsiais no funsionáriu Sekretaria Estadu Igualdade (SEI) iha Postu Administrativu Venilale.

Programa ne'e ho nia objetivu mak atu tulun comunidade lokál sira no intervenente sira iha sistema justisa nasionál hodi hadi'ak ligasaun entre nia sistema sira no mós hadi'ak justisa ida ne'ebé justu no ema hotu-hotu bele asesu iha nivel komunitáriu, ho atividade sira mak hanesan:

1. Observa prosesu rezolusaun disputa komunitáriu no hala'o peskiza lokál
2. Fornese informasaun hodi tulun halo revizaun ba iha Regra Tara-bandu
3. Fahe informasaun kona-ba progresu kazu sira hosi polísia, tribunál, prokuradoria ba iha suku sira tarjeitu
4. Advokasia atu hadi'ak liután ligasaun comunidade sira ho justisa formal
5. Fahe informasaun kona-ba asesu ba sistema justisa formal
6. Introdús *Case Log* ba konsellu suku sira no OPS

Atividade ne'e, realiza hosi JSMP, liuhosi programa Apoiu Seguransa komunitária (PASK) tamba serbisu hamutuk ho The Asia Foundation (TAF) ne'ebé finansia hosi Embaixada Nova Zelândia iha Timor -Leste.

Atu hetan informasaun kompleitu, favór kontaktu:

Ana Paula Marçal  
Diretora Ezekutiva JSMP  
Diresaun e-mail: [ana@jsmp.tl](mailto:ana@jsmp.tl)

Telephone: (+670) 33238883 | 77040735

Website: <https://jsmp.tl>